


Winnie, 3j.



suechet es nöiis Daheime mit Freigang i Garte

Liebi Tierfründe

Ig weiss es, ig bi zschpät, Wunschzettle schriibet mer ar Wiihnachte. Abr ig wünsche mir es nöiis Daheime, itze, nid erscht ar Wiihnachte. Warum? Ig wohn mit Hung u Chatz zäme, abr di närve eifach. Ig zeige das immr wiedr mou mit Proteschtmarkiere. Sy müessets doch mou kapiere: **IG MAG EIFACH CHEI ANGERI HUUSTIER!** Ig wär sooo gärn Alleiprinz. Drum!

Ig bi 3jährig, kaschtriert, gimpft, schtuberein (wenn ig nüt z'Proteschtiere ha u im Mittupunkt schtah), gsung (bis uf es Härzgrüsch, dr Doc seit, nüt schlimm, eifach beobachte), verschmuest (nur nid min Buuch aalange, der isch mir heilig) u sääär verschpiut. Ig schpiue am liebschte dr ganz Tag lang, mit auem u jädem: mit Wassr u Haargummelis u dr Angu u apportiere chan ig, Du gloubsch es nid. I mineri Verwandtschaft muess e Hung gsi sy. Ig liebe Ungerhautig u Trubu, bi mir muess immr öppis gah. Bi ou sähr nöigiirig. We Du mi bsueche tuesch, denn chomm ig sichr füre zum Beschnuppere, u apportier Dir öppis.

Ig wünsche mir es Daheime mit Freigang ire gsicherete Garte, liebi, chatzeerfahreni Mönsche, bi dene ig Nr. 1 dörft sy. Wo immr öppis los isch, gärn e Familie mit Ching ab Schueautr, di wo mit mir schpiue. Abr ohni angeri Huustier, ig bi scho ou sähr iifersüchtig u zeige das denn ou, denn bisu ig wiedr danäbe. Ig weiss es, das macht mer nid, abr ig muess doch säge, wenn mir öppis nid passt. Siit Dir e liebi Familie, wo oft öppr da isch zum Schpiue u Schmüesele? U heit Dir en gsicherete Garte, won i usse chah? U wott Dir mi aus Einzelprinze verwöhne u mi liebhave? So viu Wünsch, gäu? Abr das wär's! Denn müesset mir üs unbedingt lehre chenne. Derziit wohne ig no z'Pfungen/ZH, ig züggle abr gärn zu Öich, villiicht nid zu weit wäg, Outofahre isch nid so mis. Mäud Di doch bitte ganz gly bi dr Sonja Ball. Sie het sich mir agno u suechet für mi das nöiie Plätzli. Bsuechet Dir mi einisch? Denn chönnt ig Öich zeige, wie ig schpiue u apportiere chah. Dir wärdet schtuune!

Öir Winnie



Katze sucht Mensch - Mensch sucht Katze

Sonja Ball

Tel.Nr. 079 333 45 62

kontakt@katze-sucht-mensch.ch